

E pep niverenn eus ar gelaouenn e embannomp er rann “Soñj & disoñj” ur sell war ar pezh a gavemp e pajennoù *Bremañ* dek, ugent ha tregont vloaz zo.



30 vloaz zo > Gouere-Eost 1985 > niv. 46-47


## ➔ Ul luskad breizhek unanet evit votadeg-rannvro 1986?

E 1986 e oa bet dilennadegoù-rannvro kentañ ar Stad c'hall. E Breizh e oa aet ar maout gant Yvon Bourges (RPR) e rannvro “Breizh” ha gant Olivier Guichard (tu dehoù) e rannvro Broioù al Liger. Setu ar pezh a c'halled lenn e *Bremañ* dek miz a-raok an dilennadegoù-se : “D’ar 15 ha 16 a viz Mezheven eo en em gavet en Oriant ur pevar-ugent emsaver bennak, deut eus pep korn a Vreizh, o labourat e-barzh strolladoù disheñvel pe kevredigezhioù lec’hel hag a soñj dezho n’eus dazont ebet evit Breizh gant ar politikerezh renet gant ar strolladoù gall henvoazel”. Ha disoc’h an emvod-se : “Ur c’henurzhierzh da c’hortoz ha digor a zo bet savet [...]. Kavout a reer e-barzh [...] izili eus ar PSU, an UDB, FGA, MAN, Plan Alter Breton, CODENE Frankiz Breizh, Skol an Emsav, Ekologiezh-emvererezh Rostrenenn, ha tud all [...]. Chomet eo en diavaez ar re a oa deut a-berzh ar strollad Emgann pe ar Re C’hlas”. Emskiant e oa skridaozer ar pennad ne oa “chañs ebet evit strollad ebet, en diavaez eus ul luskad unvan, da dizhout ar 5 % eus ar mouezhioù [...] da gaout tud dilennet”. Ar gwir a oa gantañ rak al listennoù “rannvroelour-emrenour” o doa graet disoc’hoù bihan-tre e Breizh ha n’o deus bet dilennad evet er c’huzulioù-rannvro.

20 vloaz zo > Gouere-Eost 1995 > niv. 166-167

## ➔ Galv ar Mil

En niverenn dremenet eus *Bremañ* hor boa graet anv eus SAB hag ar galv e 1995 da chom hep paeañ an taos skinwel. Da-geñver Gouel Broadel ar Brezhoneg, e Spezed, e oa bet embannet : “Evit mont pelloc’h war an hent boulc’het gant Stourm ar Brezhoneg, o deus divizet aozerien ar Gouel lakaat mil a dud da reiñ o ger e nac’hint paeañ an taos skinwel”. Hervez ar skridaozer e oa bet dastumet “un nebeud kantadoù a sinadurioù” ha “strolladoù zo evel UDB, o deus embannet edont a-dud gant Galv ar Mil.”



10 vloaz zo > Gouere-Eost 2005 > niv. 285-286

## ➔ Divskouarn war sevel

E 2005 e oa bet krouet ar gevredigezh Divskouarn gant ar pal brudañ ha kas ar brezhoneg war-raok a-raok oad ar skoliata. Yannig Robin, eus magouri Dorn ha Dorn e Gouenoù, a zispleg al labour a vo kaset gant Divskouarn : “renabliñ an dud stummet evit ober war-dro ar vugale vihan hag a oar brezhoneg. Kelaouiñ an tiez-kêr war ar yalc’hadoù a c’haller kaout evit sevel magourioù a rafe gant ar brezhoneg [...]. Sevel frammoù pedagogel [...], kelaouiñ an abretañ ar gwellañ an dud diwar-benn perzhioù mat ar c’helenn divyezhek abred”. E miz Here e 2005 e oa bet dalc’het emvod-meur kentañ ar gevredigezh nevez-se. Un tamm mat a hent a zo bet graet e-korf dek vloaz hag evit lidañ kement-se e vo aozet un devezh bilañs ha divizoù d’an 28 a viz Du 2015, e Plougerne.

Evit gouzout hiroc’h : [www.divskouarn.bzh](http://www.divskouarn.bzh)